



# 諦觀全集序



印順

中國佛教自晚唐以來，教宗台賢，行歸禪淨，爾後學者莫能出其方軌，而羅什、玄奘所傳大小空有之勝義，聞之者渺矣！有清末葉，楊文會居士得『唯識述記』於東瀛；隋唐古疏，復由日本集為『續藏』而問世，於是隋唐盛世之佛學，乃漸呈復興之運。歐陽漸居士成立內學院於南京，專治奘傳唯識學，馳名於時，太虛大師成立佛學院於武昌，重奘什性相，主大乘八宗並行，蓋以隋唐盛世之佛法為理想，融貫性相於台賢禪淨之統。凡此悉中國佛法振古之學也。然近世佛法，由歐美及日人之研習，實已擴及巴利與梵藏文。由中國佛法言之，則趨於世界佛法，融攝新知之域。故內學院研習唯識，進及西藏所傳安慧唯識，法稱因明；南傳部執。虛大師擬成立世界佛學院，說『新興融貫』；總攝一切佛法，為教之三期三系，理之三級三宗，行之三依三趣，而導歸於「人生佛教」。成立漢藏教理院，傳譯藏文佛典多種。惜乎法為時崩，學人散落，啟其緒而不能見其成也。

演培法師，近代中國法將之一也。初就觀宗講寺，受天台教觀。次遊閩南、覺津、漢藏諸學院，習奘什性相，兼聞藏傳中觀之學。後抵台灣，乃習日文而間及日本學者之說。法師長於講說，其受觀宗之影響歎！主持佛學院，遊化諸方，輒多所講說，聞者每為之記。其平生著述，適應時會，以語體為文，實便初學。茲出其三十年之文稿，編為『諦觀全集』以行世。全集分「經釋」、「律釋」、「論釋」、「譯述」、「雜說」，凡二十八冊，七百餘萬言，其寫作講說之盛，可以見矣！泛覽全集之目，法師於善巧化俗外，尤致力於玄奘之譯。『解深密經』、『俱舍論』、『成唯識論』、『異部宗輪論』等諸大部，並精研而廣釋之（占全書三分之一），於後之學者，必多所助益。譯『天台性具思想論』，足以見不忘天台之學，而譯『小乘佛教思想論』、『大乘佛教思想論』，則為日本近代研究初期之作。法師之學，蓋重於化導；以性相為本，前承天台而畧及近代之學者也。

民國二十九年底，予識法師於四川漢藏教理院。在川、在閩、在港、在台、先後共住者達二十年，誠平生難得之法友矣！全集成索序於予，不能却，乃畧叙近代佛學研究之趨向，以見法師所學之所重以應之。

印順序於星洲之靈峯般若講堂

中華民國六十六年十月廿九日